

**REGIONAL NEWS BULLETIN
HEADLINES (EVENING)**

Date – 16/09/2024

Time - 18:30 Hrs

1. CM Pu Lalduhoma chuan Kawnpui leh Khamrang inkar kawng siamthat hna thawh nghal tum a ni a ti.
2. Aizawl leh Silchar inkar kawngpui a chhiat lutuk avang leh naktuk atanga tuialhthei phurtute'n nawrh an tum avangin harsatna a thleng mek.
3. Sinlung Hills Council inthlan vawi 2-na chu kumin November thla bul lam hian buatsaih tura ruahman a nih thu dawn a ni.
4. Seat 90 awmna, Jammu & Kashmir assembly inthlan thawh khatna atana campaign theih hun, vawiin tlai khan a tawp a, naktip Nilaini-ah assembly bial 24-ah vote thlak a ni ang.

<><><>

CM MEETING

Chief Minister Pu Lalduhoma chuan Kawnpui leh Khamrang inkar kawng siamthat hna thawh nghal tum a ni a ti.

Amah hmutu Mizoram Commercial Vehicle Union hruaitute hnenah Chief Minister chuan, kuminah India ramn ruahm kan dawng tha a, tuilian leh leimin a tam a ni a ti a. Chhiatna pawh a thleng nasa-in kawngpui then fel nan pawh hian sum leh pai a kal tam hle. Hei hi sorkarin a tum anga hma a lak chak theih loh chhan ber a ni, a ti a. Ruahm vanga sorkar harsatnate hriatthiamsaka lo ngaichang hram hram tura ngenin sorkar hmalak dan te a lo hrilh a. Kawnpui leh Khamrang inkar hi chu remchang hmasa berah amah ngeiin tlawh a tum thu a sawi a. Tuna Mizoram chaklakna kawngpui chhe zual lai Kawnpui leh Khamrang inkar hi Satguru company-te thawh a ni a, maintenance period-ah a lut mek a, May 2026 thleng awh tur a ni. An maintenance period a nih miau avangin NHIDCL in a laksak duh si lova, tun hi a thleng ta niin sorkar thuchhuah chuan a tarlang.

Sawrkarin an contract tihtawpsakin an maintenance fund awm ang ang hi vawiinah Mizoram PWD account-ah a luh beisei a nih thu leh chu'ng sum leh state sumte nen chak taka umzui a ni a. Hnathawktu hi hlawn thumah dah an ni a, vawiinah pawh lung trip 20 an thlen hman ang tiin thuchhuah chuan a sawi baw. Tuna maxicab service te an chawlhna chhan kawng chhe lai zawng zawng hi lung hnawha tlan theiha a rang lama siam tura an ngenna chu a theih chen chen bawhzui nghal a ni dawn a. An inkawmhona-ah hian Kawng chhia vanga maxicab service chawlhna te a rang lama inhrilhhriat ni se, an ti. Manipur chaklak luhna Kawlkulh leh Hliappui inkar kawng hi sawrkar chuan PMGSY thawh 3-na hnuaiah siam thar vek turin contractor thar kutah a hlan tawh a. Tuna lung hnawh nghal ngai leh lirthei tang nawrchhuaktu tur lei laihna khawl pawh contractor hnena ngen tha an ti.

Commercial Vehicle Union hruaitute hian kawngpui that tawh loh vanga harsatna an tawh bakah tuialhthei man sang chungchangte, lirthei kaihnhawih chhiah chungchang te, fitness test thu leh state dang atanga private car hmanga rinhlhawm taka rawn vak vel an tam thu leh an ngaih pawimawh thil dangte an thlen baw a ni.

<><><>

OIL SCARCITY

Mizoram chaklakna ber Aizawl leh Silchar inkar kawngpui a chhiat lutuk avang leh naktuk atanga tuialhthei phurtute'n tuialhthei phur tawh loh an tum avangin harsatna a thleng mek.

Silchar leh Aizawl inkar kawngpui, a bikin Kawnpui leh Khamrang inkar a chhiat lutuk avangin tuialhthei leh bungraw phur truck engemawzat a tangkhang mek a. Lirthei che vel a khawtlai avangin Aizawl khawpui leh hmun hrang hrang leh khawpui hrang hranga filling station-ah petrol leh diesel a tlem sawt hle a. A lirthei len leh tet a zirin an sem rual mek a ni. He tih lai hian tuialhthei phurtu pawl Mizoram Oil Tanker Driver Association (MOTDA) leh Petroleum Entrepreneurs and Transporters Union of Mizoram (PETUM) tun hnai a thukhawm chuan thuchhuah siamin, Kawnpui leh

Sairang inkar kangpui chu tualhthei phur te tan chetsual hlauhawm khawpa a chhiat avangin, lirthei khalhtu leh mipui te him tlan nan leh chhiatna nasat zawk pumpelh a nih theih na'n naktuk Thawhlethni atang hian tiam chin awm lova tualhthei phurte tlan loh an tum a. Hetiang boruak a nih leh tak avang hian filling station a tualhthei la tur an intlar thui thei hle a ni.

Akashvani Aizawl-in vawiin khan Aizawl Filling Station hrang hrang a tlawh kual a, Filling Station neitu tam zawk chuan tun dinhmunah Petrol leh Diesel hralh chhuah tur an neih tlem tawh thu an sawi.

District hrang hrangah pawh Tualhthei hi a vang chho mek a, Lungleia Petrol pump pali awm zinga thenkhat chu a inkhar tawh – hralh tur nei chuan lirthei ke hnih nei tan cheng 200 man zelin an pe chhuak. Champhai, Kolasib, Serchhip leh Hnahthialah te pawh Tualhthei awmchhun hi khairual zawka mipui ten an chan theih na'n a pek chhuah danah thuneitu ten ruahmanna an siam a. District thenkhatah erawh chuan tualhthei pek chhuah danah khuahkhirhna hi an la ti chhuak lo a ni.

<><><>

AGRI WHOLESALE MARKET

Agriculture & Farmer Welfare minister Pu PC Vanlalruata chuan Aizawl kawtchhuah hmun pahnihah Wholesale Market sak a nih tur thu a sawi.

Chanchinbumite a kawmnaah Pu PC Vanlalruata chuan, Agriculture department hmalakna hnuaiah Aizawl kawtchhuah hmun pahnihah thlai thar zawrhna tur, agriculture produce wholesale market sak a ni dawn tih sawiin, hemi atan hian pawisa pawh tih fel a ni tawh niin a sawi. Pu PC Vanlalruata chuan, Sihphir leh Melriatah a sakna tur hmun an ruahman tawh tih sawiin. Thlai zawrhna hmun tur sakna tur hian Mizoram sorkar chuan cheng nuai 1,000 an nei tawh a, cheng nuai 500 ve ve hmanga sak tur a ni ang, a ti.

Agriculture Minister sawi dan chuan Market Building drawing an buaipui mek a, Drawing peih a nih hunah tih tur tulte an ti ang a, building sak hna tan nghal a ni ang. Aizawl chhak leh thlang lama kawtchhuahah pawh Wholesale Market sak tum a nih thu a sawi bawk.

Agriculture produce wholesale market-ah hian thlai thar vawn thatna tur cold storage, kut hnathawktute hahchawlhna (rest room) bakah, ATM booth-te dah tum a ni.

<><><>

BORDER TRADE

Myanmar atanga dan kalha kuhva lo lut ni a sawi CBI-in an chhui dawn tih chhuanlam a Zokhawthar Indo-Myanmar border trade centre a insumdawn tawna tihtawp a nih avangin ramri a awmte'n harsatna an tawk.

Gauhati High Court thupek angin Myanmar atanga dan kalha kuhva lo lut ni a puhna chu Central Bureau of Investigation (CBI)-te'n an chhui dawn a, hemi ti tur hian Zokhawtharah CBI-te an kal dawn avangin insumdawn tawna hi Customs official-te chuan July ni 25 khan an titawp vek a. Zokhawthar village council president Pu Lalmuanpuia chuan CBI te hi August thla bul khan an thleng chhova, Champhai nen kartawnin rei vak lo an cham a, an haw leh mai niin a sawi a. CBI ho haw hnu pawha ramri a chengte thil lei leh hralh khap zui a ni chu an lungawi loh thu a sawi a. An bialtu MLA Lt. Col. Lalhmingthanga'n dan hmanga insumdawn tawna chhunzawm phalsak leh ni se ti a a sawi pui pawh Customs leh Assam Rifles lam hian an zawm lo niin khawtlang hruaitute'n an sawi a. Tun dinhmunah Zokhawthar leh a chheh vel khua-ah eichawp leh nitin mamawh thil a vang tawh a, a awm chhun pawh a man a to tawh hle niin an sawi a ni.

Ramri a insumdawn tawna tihtawp a nih avang hian dawr neite bakah puakphur (bungraw hlangtu) 500 dawn chu hna nei lovin an awm mek a. Bungraw phur leh mihring phur lut leh chhuak an awm meuh loh avangin thingpui dawrte pawhin dawrtu an nei tawh mang lo niin an sawi bawk a ni.

Zokhawthar leh Khawmawi inkara insumdawn tawna tur Zokhawthar border trade centre a Land Customs Station hi khatih laia Union Commerce Minister Nirmala Sitharaman chuan March 25, 2015 khan a hawng tawh na a, mumal taka ram pahnih insumdawn tawna hi kalpui a la ni lova, sumdawnna tihtawp a nih hma kha chuan mipui mamawh leh chakkhai erawh chu an inlei tawn reng thung a ni.

<><><>

SHC POLLS

Sinlung Hills Council inthlan vawi 2-na chu kumin November thla bul lam hian buatsaih tura ruahman a nih thu dawn a ni.

Inthlanna buatsaihtu tur State Election Commission chuan kar kalta Zirtawpni khan Sinlung Hills Council inthlan vawi hnihna lo awm tur atan hian returning officer leh assistant returning officer 12 ve ve a ruat fel tawh a. Electoral roll pawh buatsaih mek a nih thu State Election Commissioner Dr. H. Lalthlanglana chuan Akashvani Aizawl a hrilh. A hun tur chiah a la hriat theih loh chungin October thla chawhma lam hian inthlan hun tur hi puan a nih rin a ni. Sinlung Hills Council hi April ni 2, 2018 a Mizoram sorkar leh HPC (D)-te inremna anga Sinlung Hills Council Act, 2018 hmanga din a ni a. Member thlan 12 awmna Sinlung Hills Council hmasa ber chu November ni 5, 2019 khan lakluh a ni a. Member thlan 12 bakah a ruata ruat member 2 an awm bawk. He council-ah hian chief executive member (CEM), executive member (EM) pali bakah chairman leh deputy chairman an awm bawk a ni.

<><><>

ASF UPDATE

African Swine Fever (ASF) vawk pulhri leng avanga vawiin a vawk thi chu nimin lam aiin a pung leh a, niminah 27 a thih laiin vawiinah chuan district 5-ah vawk 43 thi chhinchhiah a ni.

Animal husbandry and veterinary department hotute hnen atanga thudawn danin heti hian kumin February ni 9 a Champai district Leithum khua a ASF vawk pulhri avanga vawk thi finfiah a nih atanga tun thlengin vawk 12,580 a thi tawh a. Tun dinhmunah khaw 236 chu ASF vawk pulhri lenna khua a puan mek a ni. Vawiinah hian district 3-ah vawk damlo 76 suat a ni a, hemi tiam hian kumina vawk pulhri darh zel tur venna atana vawk suat zat chu 21,664 a tling tawh bawk a ni.

<><><>

J&K 1ST PHASE CAMPAIGNING ENDS

Jammu & Kashmir assembly inthlan thawh khatna atana campaign theih hun chu vawiin tlai khan a tawp a, naktip Nilaini-ah assembly bial 24-ah vote thlak a ni ang.

Jammu & Kashmit assembly inthlan hi thawh 3-a neih tur a ni a, Sept ni 25-ah thawh hnihna, Oct. ni 1-ah thawh thumna neih a ni ang a, Oct. ni 8-ah vote chhiar a ni ang. Jammu & Kashmir assembly-ah seat 90 a awm a, general seat 74, Scheduled Caste-te tana seat hauh 7 leh Scheduled Tribe-te tana seat hauh 9 a awm a ni.

<><><>

OPERATION SADBHAV

Thlipui, Typhoon Yagi-in a nuai ramte tan India-in tanpuina beihpui, Operation Sadbhav kalpuiin thlipui tuartu ram 3, Myanmar, Laos leh Vietnam-te hnenah chhawmdawlna bungrua chi hrang hrang a thawn a, heng ramte hi thlipuiin a nuai hnuah tuilian nasa takin a tibuai zui a ni.

External Affairs Minister, Dr. S. Jaishankar-a'n a sawi danin, Indian navy lawn lian, INS Satpura-in Myanmar chhawmdawlna tur thil chi hrang hrang ton 10 a phur a, Indian Air Force thlawhna hmangin Vietnam tan chhawmdawlna bungrua ton 35 thawn a ni a, Laos tan ton 10 thawn a ni bawk.

<><><>